

## Kven bestemmer over orda?

2006-11-11

**VANSKELIG SVAR.** Det gjer verken Ny Tid, Thomas Hylland Eriksen eller Likestillingsombodet. Heller ikkje Språkrådet. Av Sylfest Lomheim , direktør i Språkrådet

NEGER OG NORDMANN. Dette grunnleggjande punktet i debatten er både Knut Olav Åmås og eg samde om. «Ingen enkeltgruppe kan avgjøre hva et ord skal bety», skriv han 5. november. Me er dermed òg rungande enige om neste punkt, når han skriv: «Det er ikke i ordboken slaget står, men på gaten.» Slik sett burde me vel òg bli samde om følgjande, som har vore essensielt for oss i debatten, nemleg at Språkrådets primære oppgåve er å forklara korleis ord blir brukte i det norske språksamfunnet.

Varierende bruk.

I lys av dette er det ikkje spesielt logisk av Knut Olav Åmås å basera oppslaget sitt på kva seks sentrale politikarar meiner om ordet «nordmann». Ein av dei er stortingspresident Torbjørn Jagland. Ikkje uventa ønskjer minst fire av dei å bruka «nordmann» som eit ord for «alle som bur i Noreg», språkmedvitne som dei er. Me må likevel halda fast det me nettopp var samde om: Ein handfull personar med makt og posisjon avgjer ikkje kva «nordmann» tyder.

Korleis er det så med «nordmann» i dag? Svaret må bli at bruken ikkje er eintydig. Mange (kanskje fleirtalet?) legg seg på ei inkluderande linje à la Jagland. På den andre sida er det framleis gjengs i vide krinsar å tolka og å bruka «nordmann» meir snevert, i samsvar med tradisjonell bruk av ordet. Den sistnemnde gruppa tykkjer at «nordmann av utenlandsk opprinnelse» kling litt rart, medan dei med inkluderande bruk av ordet tykkjer uttrykket verkar heilt greitt. Denne varierende bruken pliktar Språkrådet forklara, når me får spørsmål om korleis «nordmann» blir brukt. At Åmås og andre kan kritisera ein slik flytande bruk og dermed freista å påverka utviklinga, er legitimt og ei heilt anna sak.

Ordet «neger».

Så var det ordet «neger». Det er heva over tvil at berre femti år tilbake var det eit såre nøytralt ord i norsk. Aftenposten brukte det, novellemeisteren Johan Borgen brukte det. I 2006 har ordet «neger» blitt tvitydig, for å ikkje seia tvilsamt. Forklaringa er banal. Fleire og fleire har den siste generasjonen hevda med styrke at det er rasistisk. Problemet er at det framleis er tusenvis av nordmenn som ikkje oppfattar det slik. Dei som tvilar, kan berre ta seg ein tur vekk frå dei større byane.

Kva seier Språkrådet til slikt? Me seier to ting: det kan ikkje reint sakleg seiast at «neger» per definisjon er diskriminerande i norsk. Dei som påstår det, får raskt ei dokumentasjonsutfordring. Men me seier òg at sidan det er eit faktum at svært mange av dei som har svart hudfarge, ikkje likar ordet, tilseier vanleg folkeskikk at me let vera å bruka det i alle samanhengar der det kan oppfattast som støytande. Verre er det ikkje. Me treng ikkje snakka om «politikk» for det.

Vi treng nye omgrep.

«Vi trenger begreper som gjenspeiler en kompleks virkelighet, og som ikke er rene overgrep mot dem som omtales»,

skriv Åmås. Igjen er me enige. Det er difor Språkrådet meiner me i visse høve treng andre omgrep enn det (framleis) noko sprikande «nordmann». Både «etnisk nordmann» og «norsk statsborgar» kan vera tenlege ord i nyheitssamanheng dersom ein ønskjer eit anna presisjonsnivå (og ei anna meining) enn det «nordmann» har.

Kva så med til dømes danskar, samar, pakistanarar, amerikanarar og adopterte? Kva kan dei kalla seg? Tek Språkrådet identiteten frå folk? Nei. Det korte svaret er: kvar og ein har rett til å velja sin omtale. Ein kan vera «same» og «nordmann», ein kan vera «pakistansk» og «norsk». (Orda tyder ikkje det same av den grunn.) Veks du opp i Lofoten, kan du kalla deg «lofoting». I det jamne kvardagsspråket er det likevel sjeldan behov for meir spesifikke ord enn det slitesterke og runde «norsk».

Vedtektene seier at Språkrådet skal «observera og analysera». Dei seier òg at me skal «fremja språkleg toleranse». Me prøver på begge delar. Les mer på side 12-13 og leder side 2

## NORDMANN

Hva skal vi kalle mennesker som bor i og har tilhørighet til Norge, men som har en mørkere hudfarge enn den tradisjonelle lyse?

Ny Tid spurte Språkrådet og fikk svar fra en ansatt ved sekretariatet at en «nordmann» er det samme som en «etnisk nordmann». Rådets direktør Sylfest Lomheim forsvarte denne tolkningen i et intervju (Ny Tid 27. oktober).

«Svarte nordmenn» var forslaget fra Organisasjonen mot offentlig diskriminering (OMOD) i Aftenposten 4. november.

«Negeren og nordmannen» var tittelen på en artikkel av debatt- og kronikkredaktør Knut Olav Åmås i Aftenposten 5. november. Han kritiserte Språkrådet for ikke å forstå at det er et politisk spørsmål hvem man kaller nordmann.

Språkrådets styre drøftet striden torsdag. Etter møtet tok Lomheim på seg ansvaret for at debatten kom skjevt ut. Han beklaget at svaret til Ny Tid var skrevet i en form som det ikke burde hatt.

© Aftenposten

All articles are protected by the copyright Act. Articles may not be distributed outside the organization without the approval of Retriever or the individual publisher.

Read complete article at <https://nogo.retriever->

[info.com/prod?a=69311&d=020002200611115190&s=20002&sa=2038069&x=49f75515acbcd8433e73e033155ce8b1&tz=Europe/Oslo&t=16427140](https://nogo.retriever-info.com/prod?a=69311&d=020002200611115190&s=20002&sa=2038069&x=49f75515acbcd8433e73e033155ce8b1&tz=Europe/Oslo&t=16427140)